

Avannaata Kommuniiani qimmeqarneq pillugit ileqqoreqqusaq

Qimmit qimuttut, kiisalu qimmeqarneq qitsuuteqarnerlu pillugit Inatsisartut inatsisaat nr. 18, 30. oktobari 1998-imeersumi § 13, imm. 1 naapertorlugu, kingullermik Inatsisartut inatsisaat nr. 24, 28. novembari 2016-imi allanngortinneqartoq, kiisalu Kommunit qimmit qitsuillu pillugit ileqqoreqqusaat pillugit Namminersornerullutik Oqartussat nalunaarutaat nr. 15, 19. juuni 2003-imeersoq tunngavigalugit, aalajangerneqarpoq:

Kapitali 1

Atuuffissaa

§ 1. Ileqqoreqqusaq manna Avannaata Kommuniiani qimmeqarnermut atuuttuuvoq.

§ 2. Qimuttoqarfiit pillugit inatsimmi aalajangersakkat Avannaata Kommunia tamakkerlugu atuupput, Qimmit qimuttut, kiisalu qimmeqarneq qitsuuteqarnerlu pillugit Inatsisartut inatsisaanni § 3 naapertorlugu.

Kapitali 2

Akuersissuteqarneq aamma qimmilivissatut nunaminertanik atugassiineq

§ 3. Avannaata Kommuniiani qimmeqarnissamut Kommunalbestyrelsimit allakkatigut akuersissuteqarnissaq piumasaqaataavoq.

Imm. 2. Qinnuteqaat Avannaata Kommuniiani Teknikkeqarnermut Ingerlatsiveqarfimmut tunniunneqassaaq digitalinngorluguluunniit nassiunneqassalluni, imaqassallunilu ileqqoreqqusami matumani aalajangersakkat eqqortinneqarsimanersut uppersaataannik.

Imm. 3. Qimmeqarnissamut akuersissut inummut tunngasuuvoq, allanullu tunniunneqarsinnaanani.

Imm. 4. Inuk, ileqqoreqqusamik matuminnga peqqarniitsumik nangeqattaartumilluunniit unioqqutitsisoq, qimmeqarnissamut qitsuuteqarnissamulluunniit akuersissummik tunineqarnissaanut Kommunalbestyrelsip itigartissinnaavaa. Akuersissummillu arsaarneqarsinnaalluni.

§ 4. Avannaata Kommuniiani qimmeqarnermut, aalajangersimasumik silamiittussanut, nunaminertamik qimmiliveqarfissaq pisariaqarpoq.

Imm. 2. Qimmiliveqarfissatut nunaminertamik qinnuteqaat Avannaata Kommuniiani Teknikkeqarnermut Ingerlatsiveqarfimmut tunniunneqassaaq digitalinngorluguluunniit nassiunneqassalluni.

Imm. 3. Nunaminertamik atugassinneqarneq inummut tunngasuuvoq, allanullu tunniunneqarsinnaanani.

Imm. 4. Nunaminertamik qinnuteqaammut ilanngunneqassaaq nunap assiga, tassani sumiiffissaq titartorneqarsimassalluni illuaraqassappat aamma/imaluunniit

ungaluugaqassappat, angissusia ilanngullugu.

Imm. 5. Ileqqoreqqusat uku atuutilernerisa kingorna nunaminertanik atuisinnaanermut akuersissutit taamaallaat piffissami killilimmi atuuttussatut nunaminertamik atugassiissutaasassapput, annerpaamik ukiuni tallimanik sivisussuseqartumik. Nunaminertaamik atuisinnaanermik pigisaqartoq nunaminertap pineqartup qinnutigineqaqqinnerani salliutinneqassaaq, nunaminertamik aalajangersimasumik tunineqarumallutik qinnuteqartunit allanit.

Kapitali 3

Nalunaarsuineq akiuussutissalersuinerlu

§ 5. Piginnittup CPR-normua, aqqa, najugaa, oqarasuaataata normua, qimmip suaassusia, utoqqaasusia, akiuussutissalersimanerata killiffia, akuersissutigisallu normua (chip-nummer) ilanngullugit qimminik tamanik Avannaata Kommunia nalunaarsuissaaq.

Allannguuteqartoqarpat allannguutip kingorna ullut 30-t iluanni piginnittoq kommunimut allaganngorlugit nalunaaruteqartussaataavoq. Qimmeq toquppat, piginnittup tamanna nalunaarutigissavaa Avannaata Kommuniani Teknikkimut Ingerlatsivimmut, allakkatigut ornigunnikkulluunniit ullut 30-it qaangiutsinnagit.

Imm. 2. Qimmiutilik allakkatigut eqqaasinneqarsimagaluarluni qimmiminik nalunaarsortitsiumanngippat, Avannaata Kommunia:

- 1) pinngitsaaliissummik akiuussutissamik kapuisitsinnaavoq, nalunaaqutsersuisinnaalluni nalunaarsuisinnaallunilu piginnittup akiligassaanik
- 2) piginnittumut taarsiiviginnissutaanngitsumik qimmimik toqutsisinnaalluni, imaluunniit
- 3) qimmeq allamut tunniussinnaallugu, piginnittumut taarsiiviginnissutaanngitsumik.

§ 6. Qimmimik piginnittup qimmeq akiuussutissamik kapitittussaavaa akiuussutissalersuinissamut Naalakkersuisut pilersaarutaat malillugu

Imm. 2. Qimmiaq sisamanik qaammateqalersinnagu, piginnittoq Avannaata Kommuniani teknikkeqarnermut ingerlatsivimmut saaffiginnissaaq, qimmiaqqap akiuussutissamik kapitinnissaa siunertarlugu.

Imm. 3. Akiuussutissamut kapitinnermut uppersaataat atuuttoq pillugu Avannaata Kommunianit uppersaataat tunniunneqassaaq.

Kapitel 4

Qimmiliviit, qeqertaniititsineq pitussimatitsinerlu

§ 7. Qimmiliveqartoqarsinnaavoq taamaallaat sumiiffinni taamatut atugassatut kommunimut pilersaarummi atuuttumi immikkoortinneqarsimasuni.

Imm. 2. Nunaminertaq immatsertarpat piffissap ilaani qimmilivittut atorneqassanngilaq

immatsersimatillugu

§ 8. Qimmit pitussimassapput, inuit tamaani pisuinnaat aqqutaannut, aqqusinernut illunullu akornuteqanngitsumik tikitsisinnaaniassammata.

Imm. 2. Qimmit allap illuanut minnerpaamik 7,5 meterinik ungasitsigisumi pitunneqassap- put, tassani illulik allakkatigut allatut akuersissuteqarsimatinnagu.

Imm. 3. Pisuinnaat aqqutaannut aqqusinernullu 7,5 meterinik ungasitsigisumi qimmit pitunneqarsimassapput, tamaani kommunimut pilersaarut atuuttoq allatut piumasaqaatitaqanngippat.

Imm. 4. Inissiaqarfinnit, utoqqaat illuinit, atuarfinnit, paaqqinnittarfinnit, inuussutissaleriffinnit assigisaannillu minnerpaamik 25 meterinik ungasitsigisumi qimmit pitunneqarsimassapput.

Imm. 5. Pissutsit immikkut ittut tunngavigalugit Kommunalbestyrelsi imm. 3-mi ungasissusissamut piumasaqaammut allaanerusumik akuersisinnaavoq minnerpaamik 3 meterit tikillugit.

§ 9. Qeqertani qimmiligivissallugit qaqugukkulluunniit pilersaarutigisatut atuuttut najoqqutaralugit akuerisaasuni qimmit inissinneqarsinnaapput.

Imm. 2. Qeqertami qimmilivittut akuerisaasumi ataatsimi qimmeqatigiit ataatsit kisimik tamaaniissinnaapput.

Imm. 3. Taamaallaat sikuunnginnerata nalaani tamaani qimmiliveqartoqarsinnaavoq.

Imm. 4. Qeqertaq qimmilivittut atorneqartoq taseqassaaq paqqertanngitsumik aamma annerpaamik 20 ha.-isut angissuseqassaaq.

Imm. 5. Chip-inik nalunaarsuinnermut, akiuussutissamik kapuinnermut il.il. atatillugu qimminut nakkutilliisup/akiuussutissamik kapuisup piumasarisinnaavaa, qimmiutillip nammineq akiligaanik, qimmit aalajangersimasut qeqertami qimmiliviusumit najugaqarfimmut, qimmit nalunaarsornqarsimaffiannut assartorneqarnissaat.

§ 10. Qimmit ataasiakkaat eqqaanni imaluunniit qimuttoqatigiinnut qimmiliviup eqqaani piginnittup aqqa oqarasuaataatalu normua allagartanngorlugu piginnittumit inissinneqarsimassaaq.

Imm. 2. Piginnittoq aallarsimassappat, imaluunniit attavigineqarsinnaanngippat allatut qinigassatut inuk attavigisassap aqqa oqarasuaataatalu normua aamma allassimassaaq.

§ 11. Nunaminertat qimmilivittut atugassiarisat saligaatsuutinneqassapput, tamatigullu torersuutinneqassallutik.

Kapitel 5

Qimminut nakkutilliisoq

§ 12. Qimminut nakkutilliisussamik ataatsimik amerlanerusunilluunniit Avannaata Kommunianni Kommunalbestyrelsi toqqaassaaq, taakkulu suliassat makku isumaginissaat akisussaaffigissavai:

- 1) Inatsisitigut piumasaqaataasutut qimmit akiuussutissamik kapitissimanerannik kinaassutsimillu uppernarsaammik ID-mærkinik nalunaaqutaqarnerinik nakkutilliineq

nalunaarsuinerlu.

- 2) Qimminik piginnittuunermut nakkutilliineq nalunaarsuinerlu.
- 3) Qimmit angalaannartut, qimmit inuttaqanngitsut, kiisalu qimmit unioqqutitsilluni eqqussat pigisallu tigoorarneri, imaluunniit toqunneri.
- 4) Akiuussutissamik kapuunerup ulluanik, qimmip qassissaanik kapitinnera nalunaarsorneqassaaq nuna tamakkerlugu uumasut allattorsimaffiannut.
- 5) Akiuussutissanik toqqortaateqarneq, chip-it il.il. nalunaarsuineq, kiisalu akiuussutissalersuineri pilersaarummut tunngatillugu uumasut nakorsaatur qullersaqarfiusumut tamatuminnaga nalunaaruteqarnerit.
- 6) Piumasaqaatit § 3, imm. 1, § 4, imm. 1, § 5, imm. 1, § 6, imm. 1, § 7, § 8, § 19, imm. 1, § 11, § 14, § 15 aamma § 16 malinneqanngippata qimminik piginnittumut piumasaqaammik tunniussineq.

Kapitel 6

Akiuussutissaliisartoq

§ 13. Avannaata Kommuniani Kommunalbestyrelse qimminik akiuussutissaliinissamik ingerlatassap isumaginissaanut sulisumik ataatsimik imaluunniit arlalinnik akisussaasuussatut toqqaassaaq, taamaalilluni suliasaqarfimmi matumani inatsisitigut piumasaqaatit malinneqarniassammata.

- 1) Qimmilivissatut nunaminertani atugassiissutaasuni pituttuiffissanik qaarsumut qillerinerit.
Imm. 2. Qimminut akiuussutissaliisartoq Kalaallit Nunaanni Uumasut nakorsaatur qullersaqarfimmit ilinniartinneqassapput akuerineqassallutillu.

Kapitel 7

Qimminik pituttuineq il.il.

§ 14. Qimmit arfinilinnik qaammateqalereersimasut tamarmik kalunnernik pitussimassapput, ungaluukkani mattusimaneqassallutik imaluunniit pituutaqartinneqassallutik.

Imm. 2. Imm. 1-imi aalajangersakkanut ilaatinneqanngillat qimmit atorfillit qimmii peqquneqarneq malillugu sulisinneqartut, qimmit illoqarfiup avataani suliffiup avataatigut sammisaqarnermut naalakkisaartillugit atorneqartut, kiisali qimmit qeqertani sikuutinnagu qimmilivittut akuerisaniitinneqartut.

§ 15. Qimmeq pitussimassatillugu pituutaq minnerpaamik 3 meterinik takissuseqassaaq, qimmillu qungasequtaa qaqugukkulluunniit peerneqarsinnaassaaq.

Imm. 2. Qungasequtit qimitsissutaasinnaasut atoqqusaanngillat.

Imm. 3. Qungasequtit inngigissortallit atoqqusaanngillat.

Imm. 4. Qimmit pitutat ataasiakkaat imaluunniit marlukkaat akornanni ungasissuseq pituutat siaarsimatillugit minnerpaamik 1 meteriussaaq.

Imm. 5. Qimmit ataasiakkaat kalunneri minnerpaamik atuuttunik marlunnik qersaruteqassapput.

Imm. 6. Kalunnerit takissusia aputeqassusia naapertorlugu iluarsineqarsinnaassaaq.

Imm. 7. Qimmit panertumik nallavissaqassapput, imigassaqlutillu aputissaqassallutilluunniit.

§ 16. Arnavissat naartusut sarliartulluunniit imatut inissinneqassapput imaluunniit pitunneqassapput arnavissat qimmiaqqallu qaqugukkulluunniit oqqiffissaqarsinnaassallutik.

Imm. 2. Arnavissanut naartusunut sarliartunulluunniit aamma qimmiaqqanut qimminut oqqiffissat imaluunniit ungaluukkat naammattumik ninngussuseqarlutillu inissaqarluaassapput. Qimminut oqqiffissat imatut ilusilersugaassapput isumannaatsumik anorimut, sialummut apineranullu oqqisitsisuussallutik, sananeqaateqassallutillu qimmit namminneq ajoquserfigisinnaanngisaannik. Qimmeqarfinnut ungaluukkat qimmit namminneq anillassinnaajunnaarlugit ilusilersorsimassapput.

Imm. 3. Qimminut oqqiffissat ima angissuseqassapput, qimminut nikorfaffiusinnaassallutik, illuanut saaffiusinnaassallutik akornuteqarnanilu nallagaffiusinnaassallutik.

Kapitel 8

Qimmit pitussimangitsut

§ 17. Qaqugukkulluunniit piginnittup akisussaaffigaa qimmit qaammatit arfinillit sinnerlugit utoqqaatigisut pitussimangitsut tigussallugit pitussimatissallugillu.

Imm. 2. Qimmit angalaaginnartut, inuttaqanngitsut, kiisalu unioqqutitsilluni eqqussat imaluunniit pigisat kommunip qimminut nakkutilliisuanit tigoorarneqarsinnaapput katersorneqarlutilluunniit.

Imm. 3. Qimmit imm. 2-mi pineqartut piginnittuat qimminut nakkutilliisumit ilisimaneqarpat minnerpaamik nalunaaquttap akunnerinik 48-nik periarfissalerneqassaaq pissutsit iluarseqqullugit, taamaattorli imm. 6 aamma 7 qissimeqqaarneqassapput.

Imm. 4. Qimmit imm. 2-mi pineqartut kimit pigineqarnerat paasineqarsinnaanngippat, tiguneqassapput taavalu qimmit minnerpaamik nalunaaquttap akunnerini 72-ini inuttassarsiuunneqassapput, taamaattorli imm. 6 aamma 7 qissimeqqaarneqassapput. Inuttassarsiuussineq kommunip allaffiini, nunaqarfiit allaffiini aamma Avannaata Kommuniata nittartagaani tamanut allagarsiinikkut pissaaq.

Imm. 5. Pineqartut imm. 3-mi piffissaliunneqartup iluani iluarsineqanngippata, qimmeq allamut tunniunneqarsinnaavoq toqunneqarluniluunniit. Tamanna pissaaq piginnittumut taarsiissuteqarfiunngitsumik. Toqutsineq kommunip toqqagaanit imaluunniit uumasut nakorsaannit isumagineqassaaq.

Imm. 6. Qimmeq angalaannartoq allanut piviusumik aarlerisitsippat piginnittumut taarsiiviginnissutaanani piaartumik toqunneqassaaq.

Imm. 7. Qimmeq, kalaallit qimmiattut qimuttuunngitsaq, piaarnerpaamik tiguneqassaaq kommunimillu nakkutigineqassalluni, piginnittup pineqartumik qimmeqarnissaminut Naalakkersuisunit akuerineqarsimanerata uppersisinnegarnissaata tungaanut. Taamaangippat qimmeq ingerlaannartumik toqunneqassaaq piginnittumut taarsiiviginnissutaanngitsumik.

Kapitel 9

Maalaarutit

§ 16. Qimmeqarnermut atatillugu maalaarutit Kommunalbestyrelsimut tunniunneqassapput.

Imm. 2. Uumasut illersorneqarnissaat pillugu Inatsisartut inatsisaannik unioqqutitsinerit pillugit maalaarutit uumasut nakorsaannut aamma/imaluunniit politiinut tunniunneqassapput.

Kapitel 10

Pineqaatissiissutit

§ 19. Qimmit qimuttut, kiisalu qimmeqarneq qitsuuteqarnerlu pillugit Inatsisartut inatsisaanni § 28, imm. 2 malillugu ileqqoreqqusamik matuminnga unioqqutitsineq akiliisitaanermik kinguneqarsinnaavoq.

Imm. 2. Qimmit qimuttut, kiisalu qimmeqarneq qitsuuteqarnerlu pillugit Inatsisartut inatsisaanni § 28, imm. 4 malillugu ileqqoreqqusamik matuminnga peqqarniitsumik imaluunniit nangeqattaartumik unioqqutitsinerni sukkulluunniit qimmeqarnissamut inerteqqummik pineqaatissiisoqarsinnaavoq.

Imm. 3. Inuk malittarisassamik matuminnga nangeqqittumik unioqqutitsisoq, Kommunalbestyrelsimut inuk qimmeqarnissamut, nunaminertamilluunniit qimmiliveqarnissamut itigartinneqarsinnaavoq.

Kapitel 11

Atuutilerfia

§ 20. Ileqqoreqqusaq una atuutilerpoq **xx.xx.xxxx.**

Imm. 2. Nunaminertat atugassiissutaasimasut atuuttut, ileqqoreqqusat atuutilerneranni §§ 8-10-mik naammassinninngitsut atuinnarsinnaapput nunaminertamut atugassiinermi allanguisoqarnissaata tungaanut. Atortitsiinnarnerli ileqqoreqqusat atuutilernerannit annerpaamik ukiuni marlunni piusinnaapput, tamatuma kingorna piumasaqaatinik taaneqartunik malininngitsut, ingerlaannartumik nunaminertamit pineqartumit peerneqassapput.

Taamaalilluni Avannaata Kommuniani Kommunalbestyrelsimit akuerineqarpoq, ulloq
xx.xx.xxxx.

Lars Erik Gabrielsen

Borgmesteri

Nick Nielsen

Kommunaldirektøri

Matumuuna Avannaata Kommuniani qimmeqarnermut ileqqoreqqusaq naqissuserneqarpoq.

Namminersorlutik Oqartussat, ulloq *xx.xx.xxxx.*

Peter Borg

Aalisarnermut, Piniarnermut, Nunalerinermut Imminullu Pilersornermut Naalakkersuisoq